

道康金氏族譜序

天之化物物無無名之物天之降人人無無氏之人
盖有氏則有族有族則譜不可無也若無譜牒派系
昭穆之分不可考根源技葉之別莫能知也然則譜
之作豈不重且大耶惟我道康之金自麗道康伯諱
希祖始得貫至于本朝四次修譜而丁巳之修年未
滿一代今譜或曰其早噫挽近陸沉槿域海變桑田
且丁巳漏逸之族其歎深矣故甲子之四月漢城府
宮井洞三十二番地宗海閣摠會之席齊發便覽譜
之議因循六七年非是延施全國內地地方逸族漏宗
廣以搜採之意勢所固然然間有退步之族宗敦誼
似損憫心頗鬱將奈何奈何發矢不停起舞難廢至

壬申之殷春更論從便開所于高山之學院翌年夏
午月端陽佳節四冊五百秩編輯校正印刊于京宗
海閣告厥竣功有初克終伊誰之力是侍郎龍述多
年所費擔任之力寢郎瓊述四面周章勤勞之誠也
各述序跋請余數行弁卷以識淺文拙固辭不得強
然創率效嘖畧書

癸酉五月日遠慕堂公十世孫 澤謹序

譜者譜吾族非譜何以明百世之昭穆正一家之風
俗乎歐陽氏之譜永叔主之蘇氏之譜老泉序之以
此觀之修譜之法蓋古矣惟我金氏以新羅宗姓至
高麗道康伯諱希祖食采于茲仍貫焉譜法以三十
年爲一修而或踈或數亦不足拘常矣去丁巳譜距

今不滿二紀而更修者蒐集舊乘則先系失傳處頗多散處諸族漏譜齎恨者亦多卷秩煩多考覽亦未易故也族宗龍述自出萬金之財以助費用此非天賦之性也歟嗚呼此譜備載先系不失遠族細書便覽是三幸也如有未詳處以待後譜焉

癸酉五月上澣懈菴公十一代孫斗鉉謹序

族者類其宗也譜者記其事也何者尊其所自出而不忘本明其所自親而不踈遠此即吾修譜之綱領也孟子曰源泉滾滾盈科而後進放于四海比若人生世間莫不由祖先積德累仁而以及後昆之流派長遠者也詩不云乎天生烝民有物有則有物而有則天理之常經也有族而有譜人事之義則也而至

若昆虫之羽毛鱗介皆有類族植物之花卉草木亦有記譜可以人而不如彼之同類乎曰非也人爲萬物之最靈五行之秀氣而爲三才故尊祖重本以親九族非若昆虫草木之有類族而已然則譜可亟修明其昭穆之錯綜別其宗支之分派以明人道之正義可也不然未及幾年來歷不明以及袒免行列難分畢境路人同視終歸於夷狄禽獸之域矣譜可得已哉惟我金氏之興於東方者上自羅麗累代封君封侯稱爲東方甲族矣何其世代遙遠屢經兵燹至於後世文獻無稽深可歎也天運循環又至麗末同正公昆季出焉更爲派分枝蕃子孫蕃衍雄居各處矣至我太祖龍興之時忠敏公有大勳勞於國家叅

開國原從功臣錄卷自是文憲大振科宦連綿真可
謂東方華閥矣於是乎某派某宗遍滿八域其麗不
億而吾金修譜自壬丙至于丁巳雖曰大同實不過
全羅列邑之偏譜故每於此遺憾者存矣族弟侍郎
龍述素以碩德慈善憂其環域之同族失本罔先不
殫財力之多小諸般所費盡爲自擔務以聚族合譜
爲心眞稀世之人物也寢郎瓊述亦才德兼備篤於
敦睦不顧自身之勞苦奔馳環域務以收族團結爲
心亦曠世之異行也且規模經綸極爲簡便前日橫
間之偏譜卷帙浩煩今日縱行之大同譜只爲四冊
然遍覽極便雖千百宗支開卷瞭然叔兮姪兮兄也
弟也易知易尋而前爲越秦之肝腸今爲魯衛之湛

樂豈不美哉惟我同族盍勉旃

癸酉五月日松川公十世孫允述謹序

古之爲譜者譜同高祖之親故四世之親曰族五世則廟已毀而親屬竭服已窮而袒免殺同姓也近世則不然上世有勳爵食采之祖則百世而廟不毀廟不毀則親屬亦不竭矣故譜始祖以下子孫謂之大同譜此蓋國家敦宗族厚風俗之徽典也嗚呼吾金之貫道康者以高麗文孝公道康伯爲上祖而羅麗以後世襲勳爵其遺澤尙不斬則雖百代踈遠之族無異於同高祖之親合族同譜不亦宜乎謹按先世家乘則吾金之譜從十一世祖遠慕堂公以穆陵勳臣草創譜牒而藏諸篋笥者已百有餘年矣懿陵癸

卯始設譜役於泰仁古縣宗堂然似涉踈漏爲文孝
公子孫者太半不入可勝歎哉自是厥後累次修譜
而亦未完成難免一家之派譜故不肖詢謀諸族爲
設大同宗約所於京城積費八九年之心力博採遠
近同祖之族則或有移貫於安東光山者又有自稱
泰仁之金而不識文孝公之先系或以道康誤爲渡
江者有之誠可寒心據實記載辨昭穆分派系編成
一譜略倣儒門淵源錄體裁是亦京鄉士大夫義起
之規例也其法簡而不煩其事完且不費人家氏族
之便覽孰愈於是役旣訖諸父老屬余文以識其顛
末余乃歛衽而告之曰惟我道康之族雖親踈不同
隆替相懸然以始祖之心觀之則均是子孫也爲其

子孫不念厥祖忝厥所生苟或父子相離兄弟不和
夫妻反目以傷厥德是豈今日大同修譜之本意哉
凡此同譜之族各自惕念恐懼修省三親定位九族
敦睦推而至於鄉黨朋友莫不皆然而中國爲一人
四海爲一家吾金今日之役將有辭於天下後世矣
諸族宗尙或勉乎哉

癸酉五月日有仙齋公十二世孫龍述謹序

歲癸酉之端陽道康譜編摩之役告訖諸父老使余
爲文以弁之余作而揖曰譜旣成矣序旣備矣何敢
復贅焉蓋東邦之金皆自大輔公出我金亦然而至
高麗有諱希祖以勳業食采于道康道康氏之所由
始也上古譜法只書同高祖之族而五世以上殺而

不書不書則無徵故如宋之文明程夫子尙歎無百年之家吾家文獻之不足亦由是也今此利原之譜雖出於野史其在慎重之道不敢直系別編以附亦可畏也然司馬公之敘其世遠自重黎歐陽氏之書其譜上遡大禹由此觀之我金之系大輔公豈無所徵乎第有一說焉譜者所以重其本而取其族也雖云一家之史天敘之五典繫焉故古人弁首之文用寓勸戒以勵子孫者多矣惟以至於一人之身則孝悌之心油然而生者蘇氏之序也各知來處而忠義立焉則有益朝廷者張子之訓也同吾譜者盍各勉旃哉若其侍郎公之專力齋郎叔之勤勞尙矣勿論過周年不憚勞苦專心董役者允述氏煥鮮甫淙基

秀其人 癸酉五月日贅世公十世孫煥豐謹序
此我大同便覽譜也我族兄侍郎公以吾宗碩望篤
於先事性又寬仁汎愛族黨而慨我金之文獻無傳
子姓不振滿腔血誠志在聚族不憚自家費力滿天
下以康爲氏者廣搜傍探使之叅譜易所謂同人于
宗者其在侍郎歟此譜之所由作也不佞亦有意於
斯從侍郎公符心合謀驅馳四方北抵咸平兩關南
至康海諸郡勞筋致力者凡幾箇年矣但誠簿言微
同派近族猶有落落難合之歎是可慨也已譜旣成
略叙顛末俾我後人使知合譜之難而益懋敦宗之
誼懲於今而善於後則安知夫吾宗未艾之蔭兆朕
於此也否若其規例事實諸長老序述備矣不復贅

焉

歲在癸酉六月下澣晚悟齋公九世孫瓊述謹跋

道康金氏族譜 別編

一世

金殷悅

大安君

敬順王第四子

二世

子正矩

刑部侍郎

三世

子繼苓

吏部尙書門下侍中

四世

子漢公

工部侍郎兵部尙書

五世

子景輔

平章事

六世

子世麟(見下)

子世翊(見下)

子世羽(見下)

十一世

十世

子順輔

中書令諡文正公

九世

子若先

或云若光平章事諡莊翼公

八世

子台瑞

文科平章事諡文莊公

七世

子鳳毛

平章事封完山君諡靖平公

世麟(見上)

工部侍郎

景輔子

子起孫

平章事始籍全州